

En FRANCÉS BOYA ALÓS, Portaveu eth Grop Unitat d'Aran en Conselh Generau d'Aran, ara empara de çò que dispause er art. 97.3 en relacion en 91.4 deth Reiau Decret 2568/86 de 28 de noveme, Reglament d'Organizacion e Foncionament de Regim Juridic des Entitats Locaus, sosmeten ara consideracion deth Plen, entath sòn debat e aprovacion se s'escaatz, era següent

### Mocion

Eth barrament dera Residència de Les siguec un barrament precipitat e nefast tara economia deth Baish Aran. Un barrament improvisat, unilaterau e que non a responut a cap planificacion responsabla que esvitèsse es efèctes negatius d'ua decision com aguesta.

Era evidéncia dera sua improvisacion a estat era manca de prevision tara reubicacion des trabalhadors e trabalhadores qu'an demorat pendent long temps en sòn lòc de trabalh, sense cap ocupacion e damb es installacions barrades. Un temps que poderie auer permetut méter en practica es mesures d'ajust e de reconversion dera installacion tà esvitar eth sòn barrament.


Eth Departament de d'Empresa e Ocupacion dera Generalitat, dempús de mesi d'incertesa, a decidit quines seran es naues destinacions des trabalhadors dera Residència de Temps Liure de Les. Uns destins que compòrten er aluenhament d'aguestes familhes des sòns pòbles e dera Val d'Aran damb es grèus perjudicis qu'aguest desplaçament provòque enes sues vides familhars e personaus.

Enes diuèrses iniciatives presentades en Conselh Generau, ja sigue en forma de preguntes o de mocions, tostemp s'a reclamat, dempús deth barrament dera instalacion, era atencion as trabalhadors e trabalhadores e as sues familhes. Era existéncia d'ua negociacion dubèrta damb eth Departament d'Empresa e Ocupacion dera Generalitat en aguest sens, a estat tostemp ua esperança tad aguest collectiu.

Pes informacions actuaus, semblarie qu' aguestes negociacions non an arthenhut cap alternativa ath desplaçament forçós d'aguesti trabalhadors. Ei en aguest sens que cau ua naua accion des institucions araneses tà esvitar aguest desplaçament e cercar ua reubicación d'aguesti trabalhadors o, en sòn cas, dera major part d'eri, en ubicacions relacionades damb es sues capacitats e coneishemnets, en contèxte dera Val d'Aran, atau e com era Generalitat a hèt damb es servicis administratius, o en sòn cas, an arthenhut d'auti trabalhadors d'installacions similars.

Ei en aguest sens que des d'Unitat d'Aran presentam aguesta mocion damb er objectiu que:

1. Se torne a daurir era negociacion damb era Generalitat damb er objectiu de :
  - a. Aufrir as trebalhadors dera Residència de Les ua plaça de trabalh enes servicis publics dera Val d'Aran adaptada, ena messura de çò possible, as sues capacitats e categories laboraus.
  - b. Eth Conselh Generau elaborarà un Plan de reubicacion d'aguestes persones, amassa damb eth Departament d'Empresa e Ocupacion e es delegats sindicau, tà replaçar ad aguesti trebalhadors ena Val d'Aran, que sigue adaptat as besonhs des servicis susceptibles de contractacions de personau d'aguestes caracteristiques.
  - c. Establir es placi de demora pertinents, damb situacions laboraus de caractèr provisionau, en tot non s'artenhen es ubicacions definitives.
  - d. Exigir ath Departament d'Empresa e Ocupacion era maxima disposicion ara negociacion tara solucion d'aguest conflicte.



Francés X. Boya Alós

Val d'Aran, 11 d'hereuèr de 2013